

Supervizor Gregorian uskladio fakultativnu nastavu vjeronauke u javnim školama Distrikta Brčko sa vjerskim slobodama i državnim obavezama



Supervizor za Brčko dr Raffi Gregorian danas je izdao [Nalog supervizora](#) kojim se reguliše održavanje nastave vjeronauke i radni status vjeroučitelja u javnim školama Distrikta Brčko, u skladu sa vjerskim slobodama i obavezama na državnom nivou.

Nalogom se podsjeća da je Bosna i Hercegovina sekularna država sastavljena od tri konstitutivna naroda i ostalih, te da Ustav garantuje slobodu misli, savjesti i vjere kao osnovna prava, ali se njime ne utvrđuje nijedna zvanična vjera ili vjere Bosne i Hercegovine.

Nalogom se priznaju ugovori koje je Bosna i Hercegovina zaključila sa Svetom Stolicom i Srpskom pravoslavnom crkvom. Supervizor je mišljenja da u odsustvu sličnog ugovora sa Islamskom zajednicom, odredbe ovih ugovora koje se odnose na obrazovanje bi po analogiji trebalo da se odnose i na vjeroučitelje i časove islamske vjeronauke u Distriktu Brčko.

Supervizor Gregorian je izrazio zahvalnost liderima triju najvećih vjerskih grupa u Distriktu Brčko što su mu u više navrata, pismeno i usmeno, skrenuli pažnju na potrebu da se preciznije definiše status vjeroučitelja i vjeronauke u javnim školama Distrikta, te da bi to definisanje trebalo da dovede do poboljšanja u održavanju fakultativne nastave vjeronauke.

U skladu sa njegovim nalogom, vjeroučitelji će ubuduće moći da dobiju ugovore na neodređeno vrijeme i imaće isti status, prava i obaveze, uključujući i obaveze u pogledu stručne sprema, kao i bilo koji drugi nastavnik u skladu sa zakonima Distrikta Brčko.

Supervizor Gregorian je izrazio uvjerenje da su vjerske zajednice i vjeroučitelji posvećeni promovisanju i njegovanju multietničkog karaktera Distrikta, te da su svjesni svoje odgovornosti da nauče učenike da prihvate i poštuju sve vjere i one koji ne praktikuju ili se ne pridržavaju vjerskih običaja u duhu tolerancije i pomirenja.

Ipak, Supervizor je izrazio zabrinutost zbog opšte tendencije koja se pojavila u Bosni i Hercegovini, a pogotovo u Distriktu Brčko, prema kojoj su časovi vjeronauke, koji se nude kao fakultativan predmet u javnim školama, iz više razloga u sve većoj mjeri poprimili karakter obaveznog predmeta, što se može primjetiti po skoro stoprocentnoj stopi pohađanja takve fakultativne nastave u javnim školama Distrikta Brčko.

Osim toga, obezbjeđivanjem novca poreskih obveznika i obezbjeđivanjem prostoriya javnih škola Distrikta bez plaćanja naknade u svrhu održavanja nastave vjeronauke samo za određene vjerske grupe, načinom na koji se trenutno održava nastava vjeronauke rizikuje se da se tim određenim vjerskim grupama pridaju obilježja zvaničnih vjera, čime se druge vjerske grupe ili oni koji ne praktikuju ili se ne pridržavaju vjerskih običaja isključuju i nanosi im se šteta na način koji se može smatrati diskriminatorskim te se kao takav može zakonski i ustavno osporiti i dovesti u pitanje slobodu vjeroispovijesti i savjesti u Distriktu Brčko.

“Trenutni način održavanja nastave vjeronauke ne smije da stvori finansijsku i političku zavisnost između vlasti i određenih vjerskih grupa što potom može da dovede do mogućeg podređenog položaja jednih u odnosu na druge što je na štetu i jednih i drugih,” rekao je supervizor.

Stoga, Nalogom se naglašava da će se nastava vjeronauke u školama i dalje odvijati na dobrovoljnoj osnovi i prema slobodnoj volji roditelja ili zakonskih staratelja učenika i podstiče uvođenje odgovarajućih sekularnih predmeta kao izborna alternativa fakultativnoj nastavi vjeronauke.